

EW NAMOPUNG

A ekkesiwini ewe Annukun Chuuk No. 27-1-6, me pwan ren ekkoch popun.

Epwe pung me ren ewe Legislature-un ewe Muun Chuuk.

Tetten 1. Tetten 5 me non Annukun Chuuk No. 27-1-6 iei a ekkesiwin ngeni ei ititin:

"Tetten 5. Uttutun Muun Fonu. Nupwen mei wor noun muun fonu charter ika annuk mei fiu fongon, ewe Election Commissioner epwe wisen auwonam won meinisin ren tumunun me nenenemen an muun fonu uttut meinisin, angangen rechisterin chon uttut, angangen anean fout meinisin, me appion pungun uttut meinisin an State me ekkewe muun fonu non napanap mei affat ren an State uttut, fiti pungun ei annuk mei forutiw me fan. Ika ew municipal charter ika annukun muun fonu mei u-ngeni ika oppurara ei annuk, ika rules me regulations mei for fan pungun ei annuk, ei annuk me chienan kewe rules me regulations repwe auonam me pochokun; Nge, ika ese wor annukun muun fonu ika charterin municipal mei fori annukun uttut, ren an epwe affata napanapen mwokutun uttut, register-in chon fout, kapachen fout, appion pungun uttut, ewe Election Commissioner epwe awora regulations fan iten ekkei, epwe chok pwan usun kapasen ei annuk, nge epwe pwan anonga won napanapen ewe neni, iwe ekkena regulations repwe pochokuneni pochokunen annuk."

Tetten 2. Tetten 35 me non Annukun Chuuk No. 27-1-6 iei a ekkesiwin ngeni ei ititin:

"Tetten 35. Awewen Choon Resap Uttut non Wesetan Neniier-Taropwen Uttut Ren Choon Resap Uttut non Neniier.

1) Ioon a rechister iwe a tufichin fiti uttut non uttutunap ika uttut atapwanapwan mei tongeni uttut non ew neeni esap wesetan neniian ika pwe:

(a) A mwochutiw non imwan ika pioing ren an samaw ika terin inisin a eppet i an epwe tufichin feino ngeni neniian uttut; ika

(b) ese tufichin uttut pokiten mei nomw nemataw ika ese nomw won ewe fonu.

2) Ewe taropwen uttut fan iten chon rese nomw mei weselesen pungun ewe taropwen uttut mei mumuta me non ei annuk ren an epwe ammasou me nukun nenien uttut ika mwen ewe ranin uttut."

Tetten 3. Tetten 40 me non Annukun Chuuk No. 27-1-6 iei a ekkesiwin ngeni ei ititin:

"Tetten 40. Uttut Non Pwan Ew Neni.

1) Emon chon uttut non ew uttutun muun state ika muun municipal, epwe tongeni uttut non ewe ranin uttut non pwan ew nenien uttut esap wesetan an we nenien uttut ika pwe e fori ekkeei mettoch:


(a) Mei registerini itan an epwe fiti uttut non an we nenien uttut ika election precinct; pwan

(b) a esine ngeni ewe Election Commissioner non taropwe fisu ran me mwen ewe ranin uttut pwe esap uttut non nenien-we, nge epwe fiti uttut ika epwe fout non ew nenien uttut me nukun.

2) Ika ewe tungoren fiti uttut non ewe neni mei foor fisu ran me mwen ewe ranin uttut, esap mang seni nimu ran me murin an tori ewe taropwen tungor, ewe Election Commissioner epwe muttir chok assainei pwan esine ngeni ewe chon uttut non ese nifinifin anien esinesin, pwan pachenong radio, usun porausen menni nein epwe fiti uttut non. Ika a sinei usun ewe porausen an nenien uttut, iwe ewe chon uttut epwe mumu ngeni an epwe uttut non chok ena neni a assain ngeni ie.

3) Ewe Election Commissioner epwe esisina apokun iten ewe chon uttut iten ewe nenien uttut epwe uttut ie me non ewe pukenapen iten chon uttut me non an we nenien uttut. Ei esinesin epwe pwarata pwe ewe chon uttut epwene uttut non ewe ew minefon nenien uttut nge esap chiwen mumu ngeni an epwe chiwen uttut non wesetaan an we nenien uttut. Ewe Election Commissioner epwe awora taropwen uttut ngeni ekkewe minefoon nenien uttut ren fan iten ekkewe chon uttut ir mei fori me apwonuweta pungun ei tetten."

Tetten 4. Ei Namopung epwe poputa pochokunan fansoun an a kapunguno me  
ren ewe Kepina non Chuuk, ika fansoun an a pusin winiti annuk won winikapan.

Sain seni:   
Simeon Innocenti, Speaker  
Truk State Legislature

Annetatar   
711 Datsi Albert  
Legislative Chief Clerk  
Truk State Legislature

Pwinin maram: Dec 15, 1984

A Kapunguno seni:   
Erhart Aten, Governor  
Truk State Government

Pwinin maram: December 26, 1984